

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

সংবাদ গতিধারা

জাতীয় দৈনিকসমূহে প্রকাশিত সংবাদ, সম্পাদকীয়র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা-৭৬/২০১৯-২০২০

ঢাকা, ৯ অক্টোবর বুধবার ২০১৯, ২৪ আশ্বিন ১৪২৬

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে

- ১। রাষ্ট্রপতি সপ্তাহব্যাপী সফরে কিশোরগঞ্জ যাচ্ছেন আজ
- ২। চলমান দুর্নীতিবিরোধী অভিযান সফল করতে সকলের প্রতি আহ্বান রাষ্ট্রপতির
- ৩। প্রধানমন্ত্রীর যুক্তরাষ্ট্র ও ভারত সফর নিয়ে সংবাদ সম্মেলন আজ
- ৪। আবরার হত্যায় আরও ৩ গ্রেফতার : ৫ দিনের রিমান্ডে ১০ জন
- ৫। আবরার হত্যায় জড়িতদের শাস্তি পেতেই হবে : প্রধানমন্ত্রী
- ৬। আবরার হত্যাকাণ্ডে জড়িতদের দৃষ্টান্তমূলক শাস্তি দেয়া হবে : সেতুমন্ত্রী
- ৭। আবরার হত্যাকারীদের বিচারের কাঠগড়ায় দাঁড়াতে হবে : ব্রাহ্মণবাড়িয়ায় আইনমন্ত্রী
- ৮। আমদানিকৃত গ্যাস প্রক্রিয়াজাত করে ভারতে রপ্তানি করা হবে  
এতে লাভবান হবে বাংলাদেশ : সিলেটে পররাষ্ট্রমন্ত্রী
- ৯। বিবিবি অ্যাওয়ার্ড অনুষ্ঠানে যোগ দিতে যুক্তরাজ্য যাচ্ছেন শিল্পমন্ত্রী
- ১০। চামড়া শিল্পনগরী সংক্রান্ত সভার সিদ্ধান্ত  
আগামী বছরের শুরুতেই এলডব্লিউজি সনদ অর্জনের প্রক্রিয়া শুরু হবে
- ১১। বঙ্গবন্ধু সেতুর পাশে জানুয়ারিতে রেলসেতু নির্মাণকাজ শুরু হবে : রংপুরে রেলমন্ত্রী
- ১২। বিশ্বায়নের সঙ্গে তাল মেলাতে চাই প্রযুক্তি দক্ষতা : আইসিটি প্রতিমন্ত্রী

**১। রাষ্ট্রপতি সপ্তাহব্যাপী সফরে কিশোরগঞ্জ যাচ্ছেন আজ**

রাষ্ট্রপতি মোঃ আবদুল হামিদ সাতদিনের সফরে আজ (৯ অক্টোবর বুধবার) তাঁর প্রথম নির্বাচনী এলাকা কিশোরগঞ্জের তাড়াইল পরিদর্শনে যাচ্ছেন। সফরকালে তিনি উপজেলা পরিষদ চত্বরে নির্মিত স্বাধীনতা ‘৭১ ভাস্কর্য’ উদ্বোধন করবেন। পরে তাড়াইল মুক্তিযোদ্ধা সরকারি কলেজ মাঠে রাষ্ট্রপতিকে এক নাগরিক সংবর্ধনা দেওয়া হবে।  
সূত্র : ইত্তেফাক (পৃ.১৯,ক.৬), সমকাল (পৃ.১৫,ক.৫), ইন্ডিপেনডেন্ট (পৃ.৩,ক.৬), নিউ নেশন (পৃ.৩,ক.৪)।

**২। চলমান দুর্নীতিবিরোধী অভিযান সফল করতে সকলের প্রতি আহ্বান রাষ্ট্রপতির**

রাষ্ট্রপতি মোঃ আবদুল হামিদ দেশ থেকে জঙ্গিবাদ, মাদক, চাঁদাবাজি ও জুয়াসহ সব ধরনের দুর্নীতির বিরুদ্ধে সরকারের চলমান অভিযানকে সফল করার জন্য সকলের প্রতি আহ্বান জানিয়েছি। বঙ্গভবনে বাঙালি হিন্দু সম্প্রদায়ের সবচেয়ে বড় ধর্মীয় উৎসব দুর্গাপূজা উপলক্ষ্যে গতকাল (৮ অক্টোবর সোমবার) আয়োজিত এক অনুষ্ঠানে তিনি আহ্বান জানান। রাষ্ট্রপতি বলেন, দুর্নীতি দেশের আর্থ সামাজিক উন্নয়নে সবচেয়ে বড় বাধা। কাজেই চলমান দুর্নীতি বিরোধী অভিযানকে সফল করতে সবাইকে অবশ্যই এগিয়ে আসতে হবে। তিনি বলেন, সবাইকে ধর্মীয় অনুশাসন অনুযায়ী সব ধরনের দুর্নীতি ও অন্যায় কাজ দূর করার নীতিগতভাবে অঙ্গীকার করতে হবে। ধর্ম অন্যায় কাজ করতে নিষেধ করে। রাষ্ট্রপতি বলেন, সাম্প্রদায়িক সম্প্রীতি বাংলাদেশের সবচেয়ে পুরোনো ঐতিহ্য এবং সমাজের সকল স্তরের মানুষকে কাঁধে কাঁধ মিলিয়ে ঐক্যবদ্ধভাবে এ ঐতিহ্যকে সামনে এগিয়ে নিয়ে যেতে হবে। সূত্র : ইত্তেফাক (পৃ.৩,ক.৫), সমকাল (পৃ.২,ক.৫), ডেইলি সান (পৃ.২,ক.২), অবজারভার (শেষ পৃ,ক.১)।

**৩। প্রধানমন্ত্রীর যুক্তরাষ্ট্র ও ভারত সফর নিয়ে সংবাদ সম্মেলন আজ**

প্রধানমন্ত্রী শেখ হাসিনা আজ (৯ অক্টোবর বুধবার) বেলা সাড়ে ৩টায় গণভবনে সাংবাদিক সম্মেলনে বক্তব্য রাখবেন। সম্প্রতি তাঁর যুক্তরাষ্ট্রের নিউইয়র্কে জাতিসংঘ অধিবেশনে যোগদান ও ভারতের দিল্লি সফরের অর্জন ও সফলতা তুলে ধরতে এ সাংবাদিক সম্মেলনের আয়োজন করা হয়েছে। সূত্র : ইত্তেফাক (পৃ.১৯,ক.৪), সমকাল (পৃ.২,ক.৮), ডেইলি সান (শেষ পৃ,ক.৮), নিউ নেশন (পৃ.১,ক.১)।

**৪। আবরার হত্যায় আরও ৩ গ্রেফতার : ৫ দিনের রিমান্ডে ১০ জন**

বাংলাদেশ প্রকৌশল বিশ্ববিদ্যালয়ের (বুয়েট) ছাত্র আবরার ফাহাদ হত্যায় জড়িত অভিযোগে বিশ্ববিদ্যালয়ের আরও তিন ছাত্রকে গতকাল (৮ অক্টোবর মঙ্গলবার) গ্রেফতার করেছে পুলিশ। এছাড়া এ হত্যা মামলায় গ্রেফতার ছাত্রলীগ থেকে বহিস্কৃত ১০ নেতাকর্মীকে জিজ্ঞাসাবাদের জন্য পাঁচ দিনের রিমান্ডে পাঠিয়েছে আদালত। ঢাকা মহানগর হাকিম সাদবীর ইয়াসির আহসান চৌধুরী সৃষ্ট তদন্তের জন্য গতকাল এ রিমান্ড মঞ্জুর করেন। সূত্র-সমকাল (পৃ.১,ক.১), যুগান্তর (পৃ.১,ক.৭), ডেইলি সান (পৃ.১,ক.৪), অবজারভার (পৃ.১,ক.২)।

**৫। আবরার হত্যায় জড়িতদের শাস্তি পেতেই হবে : প্রধানমন্ত্রী**

প্রধানমন্ত্রী শেখ হাসিনা বলেছেন. বাংলাদেশ প্রকৌশল বিশ্ববিদ্যালয়ের (বুয়েট) মেধাবী শিক্ষার্থী আবরার ফাহাদকে নির্মমভাবে হত্যার ঘটনায় জড়িত সবার শাস্তি পেতেই হবে। এ ধরনের মর্মান্তিক ঘটনা যারা ঘটিয়েছে, তাদের কাউকেই ছাড় দেওয়া হবে না বলে কঠোর হুঁশিয়ারি উচ্চারণ করেন তিনি। একইসঙ্গে প্রধানমন্ত্রী বুয়েটের এ হত্যাকাণ্ডকে কেন্দ্র করে বিশ্ববিদ্যালয় এলাকায় কেউ যাতে অস্থিতিশীল পরিস্থিতি সৃষ্টি করতে না পারে সেজন্য সবাইকে সতর্ক থাকার নির্দেশ দিয়েছেন। গতকাল (৮ অক্টোবর মঙ্গলবার) গণভবনে দলের কেন্দ্রীয় নেতাদের সঙ্গে অনির্ধারিত এক বৈঠকে প্রধানমন্ত্রী এ নির্দেশ দেন। সূত্র : ইত্তেফাক (পৃ.৪,ক.১), সমকাল (পৃ.১,ক.৫), ডেইলি সান (পৃ.১,ক.২), অবজারভার (পৃ.১,ক.৬)।

৬। আবরার হত্যাকাণ্ডে জড়িতদের দৃষ্টান্তমূলক শাস্তি দেয়া হবে : সেতুমন্ত্রী

সড়ক পরিবহণ ও সেতুমন্ত্রী ওবায়দুল কাদের বলেছেন, অপরাধীদের শাস্তি পেতেই হবে। প্রধানমন্ত্রী শেখ হাসিনার আমলে অপরাধ করে কেউ ছাড় পায়নি, পাবেও না। গতকাল ( ৮ অক্টোবর মঙ্গলবার) ধানমন্ডিস্থ আওয়ামী লীগ সভানেত্রীর রাজনৈতিক কার্যালয়ে এক সংবাদসম্মেলনে তিনি এসব কথা বলেন। প্রধানমন্ত্রী শেখ হাসিনার আমলে অপরাধী সবাইকেই শাস্তি পেতে হয়েছে। আওয়ামী লীগের মন্ত্রী, এমপি এবং দলের নেতাদের বিরুদ্ধেও অপরাধের দায়ে সাংগঠনিক ও প্রশাসনিক ব্যবস্থা নেয়ার নজির রয়েছে। তিনি আরো বলেন, বুয়েট ছাত্র আবরার হত্যাকাণ্ড খুবই দুঃখজনক। এ ঘটনায় ৫ মিনিটের মধ্যে ছয় জনকে গ্রেফতার করা হয়েছে। কয়েকজনকে বহিষ্কার করা হয়েছে। জড়িতদের দৃষ্টান্তমূলক শাস্তি দেয়া হবে। অপরাধী কাউকে ছাড় দেয়া হবে না। চলমান সন্ত্রাস, দুর্নীতি ও মাদকবিরোধী অভিযান অব্যাহত থাকবে। সূত্র : ইত্তেফাক (শেষ পৃ,ক,৫), সমকাল (পৃ.৩,ক,৫), ডেইলি সান (শেষ পৃ,ক,৫), নিউজ টুডে (পৃ.১,ক,৮)।

৭। আবরার হত্যাকারীদের বিচারের কাঠগড়ায় দাঁড়াতে হবে: ব্রাহ্মণবাড়িয়ায় আইনমন্ত্রী

আইন, বিচার ও সংসদ বিষয়ক মন্ত্রী অ্যাডভোকেট আনিসুল হক আবরার ফাহাদ হত্যাকাণ্ড অত্যন্ত মর্মান্তিক ও দুঃখজনক বলে মন্তব্য করে বলেছেন, এ ঘটনা যারা ঘটিয়েছে তাদেরকে বিচারের কাঠগড়ায় দাঁড়াতে হবে। তাদেরকে উপযুক্ত শাস্তি দেওয়া হবে। গতকাল ( ৮ অক্টোবর মঙ্গলবার) ব্রাহ্মণবাড়িয়ার আখাউড়া রেল স্টেশনে সাংবাদিকদের তিনি এসব কথা বলেন। সূত্র : ইত্তেফাক (পৃ.১৯,ক,৮), সমকাল (পৃ.৩,ক,১)।

৮। আমদানিকৃত গ্যাস প্রক্রিয়াজাত করে ভারতে রপ্তানি করা হবে

এতে লাভবান হবে বাংলাদেশ : সিলেটে পররাষ্ট্রমন্ত্রী

পররাষ্ট্রমন্ত্রী ড. এ কে আব্দুল মোমেন বলেছেন, বিদেশ থেকে আমদানিকৃত গ্যাস প্রক্রিয়াজাতকরণ করে তা ভারতে রপ্তানি করা হবে। এতে বাংলাদেশেরই লাভ হবে। দেশের প্রাকৃতিক গ্যাস রপ্তানি হচ্ছে না। কিন্তু একটা ভুল ধারণা তৈরি হচ্ছে যে, ভারতকে বাংলাদেশ গ্যাস দিয়ে দিচ্ছে। গতকাল (৮ অক্টোবর মঙ্গলবার) সিলেট বিভাগীয় স্টেডিয়ামের নির্মাণকাজ পরিদর্শন শেষে সাংবাদিকদের প্রশ্নের জবাবে তিনি এসব কথা বলেন। সূত্র : ইত্তেফাক (পৃ.১৯,ক,৭), সমকাল (পৃ.১৫,ক,৫), ইন্ডিপেন্ডেন্ট (পৃ.১৫,ক,২), অবজারভার (শেষ পৃ,ক,৫)।

৯। বিবিবি অ্যাওয়ার্ড অনুষ্ঠানে যোগ দিতে যুক্তরাজ্য যাচ্ছেন শিল্পমন্ত্রী

বার্মিংহামে অনুষ্ঠেয় 'তৃতীয় ব্রিটিশ বাংলাদেশি বিজনেস (বিবিবি) অ্যাওয়ার্ড ২০১৯' অনুষ্ঠানে অংশ নিতে আজ (৯ অক্টোবর বুধবার) যুক্তরাজ্যের উদ্দেশে ঢাকা ত্যাগ করবেন শিল্পমন্ত্রী নূরুল মজিদ মাহমুদ হুমায়ূন। ২০১৫ সালে এ পুরস্কার চালু করা হয়। শিল্প মন্ত্রণালয় জানায়, আগামীকাল বার্মিংহামের হকলে সার্কাস রোডে অবস্থিত বিংলে হলে এ পুরস্কার প্রদান করা হবে। এতে শিল্পমন্ত্রী প্রধান অতিথি হিসেবে যোগ দেবেন। সূত্র-বণিক বার্তা (পৃ.২,ক,৫)।

১০। চামড়া শিল্পনগরী সংক্রান্ত সভার সিদ্ধান্ত

আগামী বছরের শুরুতেই এলডব্লিউজি সনদ অর্জনের প্রক্রিয়া শুরু হবে

চলতি বছরের ডিসেম্বরের মধ্যে ঢাকা চামড়া শিল্পনগরীর কেন্দ্রীয় বর্জ্য শোধনাগারসহ (সিইটিপি) সব কাজ সমাপ্ত হবে। এরপর আগামী বছরের শুরুতেই লেদার ওয়াকিং গ্রুপের (এলডব্লিউজি) সনদ অর্জনের জন্য নিরীক্ষার আমন্ত্রণ জানানো হবে। বর্তমানে যে গতিতে চামড়া শিল্পনগরীর কাজ চলছে, তাতে করে আগামী বছরের প্রথম দিকে বাংলাদেশ চামড়া শিল্পের জন্য এলডব্লিউজি সনদ অর্জনে সক্ষম হবে। গতকাল (৮ অক্টোবর মঙ্গলবার) ঢাকা চামড়া শিল্পনগরীর কেন্দ্রীয় বর্জ্য শোধনাগারসহ (সিইটিপি) প্রকল্পের সার্বিক বাস্তবায়ন অগ্রগতি পর্যালোচনা সভায় এ সিদ্ধান্ত নেয়া হয়। শিল্পমন্ত্রী নূরুল মজিদ মাহমুদ হুমায়ূন এতে সভাপতিত্ব করেন। সূত্র-বণিক বার্তা (পৃ.১২,ক,৬)।

**১১। বঙ্গবন্ধু সেতুর পাশে জানুয়ারিতে রেলসেতু নির্মাণ কাজ শুরু হবে : রংপুরে রেলমন্ত্রী**

রেলমন্ত্রী নূরুল ইসলাম সুজন বলেছেন, ঢাকার সঙ্গে পশ্চিমাঞ্চলীয় রেলের যোগাযোগ একমাত্র বঙ্গবন্ধু সেতু দিয়ে। এ সেতু দিয়ে আর নতুন কোনো ট্রেন চলাচলের অনুপযোগী। এ সমস্যা সমাধানে বঙ্গবন্ধু সেতুর পাশে বঙ্গবন্ধু রেল সেতু নির্মাণ করা হবে। আগামী জানুয়ারি মাসে দুই লাইনবিশিষ্ট ডুয়েল গেজের এ সেতুর নির্মাণ কাজ শুরু হবে। ২০২৩ সালে নাগাদ সেতু নির্মাণকাজ শেষ হবে। আগামী ১৬ অক্টোবর প্রধানমন্ত্রী ভিডিও কনফারেন্সের মাধ্যমে রংপুর বিভাগের তিনটি নতুন ট্রেন চলাচলের উদ্বোধন উপলক্ষে গতকাল (৮ অক্টোবর মঙ্গলবার) রংপুর রেল স্টেশন পরিদর্শনে এসে সাংবাদিকদের তিনি এসব কথা বলেন। সূত্র : ইত্তেফাক (পৃ.৪,ক,১), সমকাল (পৃ.১৫,ক,১)।

**১২। বিশ্বায়নের সঙ্গে তাল মেলাতে চাই প্রযুক্তি দক্ষতা : আইসিটি প্রতিমন্ত্রী**

তথ্য ও যোগাযোগ প্রযুক্তি (আইসিটি) প্রতিমন্ত্রী জুনাইদ আহমেদ পলক বলেছেন, অব্যাহত প্রযুক্তির যুগে নিজেদের বিশ্বায়নের সঙ্গে তাল মিলিয়ে চলতে হলে দরকার প্রযুক্তিগত দক্ষতা, সৃজনশীলতা ও উদ্ভাবনী ক্ষমতা বাড়ানো। বিশ্বব্যাপী মানুষের জীবনধারা ডিজিটাল হওয়ার ফলে শুধু অতীতের ধারাবাহিকতা বা দক্ষতার ওপর নির্ভর করে আগামী দিনের পরিবর্তিত পরিস্থিতিতে টিকে থাকা যাবে না। গত ৭ অক্টোবর সোমবার আর্মেনিয়ার রাজধানী ইয়েরেভানেতে চলমান তিন দিনব্যাপী ওয়ার্ল্ড কংগ্রেস অন ইনফরমেশন টেকনোলজিতে (ডব্লিউসিআইটি) বাংলাদেশ স্টলের উদ্বোধন করেন আইসিটি প্রতিমন্ত্রী। সূত্র-বণিক বার্তা (পৃ.২,ক.৩)।

**সম্পাদকীয়**

- ক. **জনকণ্ঠ** : রাজধানী ঢাকার ট্রাফিক সিগন্যাল ব্যবস্থা আজ পর্যন্ত ডিজিটাল হয়নি উল্লেখ করে আধুনিক শহর গড়ে তোলার জন্য বিজ্ঞানসন্মত সিগন্যাল ব্যবস্থা গড়ে তোলার ওপর গুরুত্বারোপ।
- খ. **ইনকিলাব, যায়যায়দিন, ভোরের কাগজ, সমকাল, যুগান্তর** : বাংলাদেশ প্রকৌশল বিশ্ববিদ্যালয়ের দ্বিতীয় বর্ষের মেধাবী শিক্ষার্থী আবরার ফাহাদ রাব্বীর হত্যাকাণ্ডের সাথে জড়িতদের দৃষ্টান্তমূলক শাস্তি দাবি।
- গ. **বণিক বার্তা** : টিকিটের মূল্য অস্বাভাবিক বাড়ার পরও রেলওয়ের সেবার মান বাড়াইনি উল্লেখ করে পর্যাপ্ত অবকাঠামো নির্মাণ ও ব্যবস্থাপনা উন্নত করার সুপারিশ।
- ঘ. **সংবাদ** : দেশে প্রবৃদ্ধি যে হারে বাড়ছে, দারিদ্র্য সে হারে কমছে না-বিশ্বব্যাংকের এক প্রতিবেদনের কথা উল্লেখ করে দারিদ্র্যহ্রাসে বৈষম্য দূর করার পাশাপাশি অর্থনৈতিক অগ্রগতির জন্য কাজ করার ওপর গুরুত্বারোপ।
- ঙ. **অবজারভার** : বজ্রপাতে মৃত্যুর ঘটনা বাড়ছে উল্লেখ করে পরিবেশের এ ধরনের বিপর্যয় রোধে বেশি করে গাছ লাগানোর আহ্বান।

**নিবন্ধ ও ফিচার**

যায়যায়দিন পত্রিকায় প্রকাশিত ‘মেধাবীরা আসুক শিক্ষকতায়’ শিরোনামের নিবন্ধে বলা হয়েছে, একজন ভালো শিক্ষক একটি ভালো জাতি গঠনে অগ্রণী ভূমিকা রাখে।

#

ডালিয়া/মরজিনা/সাইদা/রশীদ/মাসুম/২০১৯/৯.০০ঘন্টা

